



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 10

Yangia anidakangma :

f Tir Yimiyim

Instagram tiryimiyim@aolima

YouTube tir yimiyim

TAPAK 7



Bernarda Pera-i
Hamburg Open kokogo



Tribal nisungtemi Tir, Droupadi
Murmu dak teimla aika akar

VOL. XIX NO. 279 (ADOK 279)

DIMAPUR AMUNGNÜ (SUNDAY)

CHITENI (JULY) 24, 2022

₹ 5.00

COVID-19 Nagaland: 8 dak putet, 1 asü

Kohima, July 23, 2022 (TYO): Nagaland nung Honibarnü nisung 8 dak COVID-19 putet, 9 taneptsü angu aser 1 asü.

Tanü Kohima nung nisung 6 aser Dimapur nung 2 dak COVID-19 putet. Parnok züngsema nisung ajak agi 35,683 kümogo.

Nagaland nung tang nisung 90 anepaludar aser parnok rongnung nisung 1 ventilator nung, 4 oxygen agidar, 52 dak shirangba yimya terara lir saka 33 dakbo shirangba yimya kecha mali.

Honibarnü Kohima nung nisung 5 aser Dimapur nung 4 taneptsü aser parnok züngsema taneptsü angur ajak agi nisung 33,328 kümogo.

Külen, Dimapur nung COVID-19 puteta alir ka asü aser iba nisung züngsema tasür ajak agi 766 kümogo, saka parnok pungubo tanga tashidak ajanga asü.

Nagaland nung COVID-19 alitsü akok ta temulung melemi bilemba sample 4,76,366 tendangogo.

July 23, 2022 tashi nung COVID-19 vaccine indang dose 18,98,024 agütsüogo.

Hokolbarnü Nagaland nung nisung 20 dak COVID-19 puteta liasü aser iba ya taküm April 24 nungi nisung teimtiba dak putetba liasü.

Yashi Dimapur nung nisung 12, Kohima nung 7 aser Mokochung nung 1 dak putet.

Kiyimtsü memulungba atema tebur kati tetsür ka khaset

Dimapur, July 23, 2022 (Agencies): Chümoukedima district kübok Dhansiripar sub-division nung Honibar anepdang 5:30 ako meta tebur kati Kiyevi village nung associate youth pastor khaset.

Associate youth pastor ya arishi küm 30 tain Alivi Swu liasü aser Kitoka Yephthomi ta ser tebur kati la den kiyimtsü asüngdangba magizükba atema pai la khaset ta osang angazüker.

Alivi Swu ya taküm nungi Kiyevi village church nung Associate youth pastor inyaka aru aser la ya Niuland district kübok Vihuto village nungi liasü. Külen, Kitoka Yephthomi ya

Aquqhnaqua area kübok Pihekhu nung liasü.

Kitoka-i Kiyevi tashi taxi ka hire sür ao aser Alivi ki atongba sülen la khaset. Iba sülen pai pa sasa khaset, ta Dimapur Commissioner of Police, Rothihu Tetseo-i ashi.

Iba mapang taxi driver ji kima nung liasü aser injang ola angashiba sülen pai yimdaklirtem jatap. Tasü mang anaprongji kasa tesem nung dang liasü, ta Rothihu Tetseo-isa ashi.

Iba ya komaser atalok'ar kuli tejangja mengutet lir saka onoki bushisüngdang südar, ta Rothihu-isa shisem.

WSH aser Niuland NGOs-i tax magütsütsü bangjemtep

Dimapur, July 23, 2022 (TYO): Niuland district nung Western Sumi Hoho (WSH)-i NGO tongti ajak den külem senden ka ayonga menogo.

Iba senden ya Honibarnü DC conference hall, Niuland Town nung ayongzük aser Niuland District GBs Association, Niuland Area Citizens Forum, Niuland Development Council, Niuland Area GBS Association, Niuland Area Totimi Hoho o Niuland Area Students Union nungi züngsemtem aden.

Tanü senden nung terenlok mapa inyaksüba, NPGs ajanga sen saruba, land allotment teblemstü aser Niuland area nung yi aser mozü talubosa amshiba onüktem benoka lemsatap.

Niuland district administration ajanga lateta aliba inyakyim ama mesüi land allotment maparen inyaker aser iba mapa bushisüngdangtsü atema züngsem pungu agi akümbe committee ka tentetstü atema tanü senden

nung lemtetogo. Niuland nung telungpur telok balalai tax saruba ajanga tejakleni aoba aser terenlok mapa nung tetsükdaktsü ajurur anungji telungpur telok ka nem danga tax magütsütsü ta tanü senden nung adenertemisa bangjemtep.

Terenlok mapa ya ajak atema lir anungji ali kiburtem dang sorkar nungi land compensation memeshitsüla ta senden nung adenertemisa metetdaktsü.

Külen, Students Union, Totimi Hoho aser Citizens Forum of Niuland ajanga Niuland nung yi aser mozü shibelenba maparen aziüktsü atema mapa lemezüktsü.

WSH-isa entrepreneurs aser shishilembartem dang tetsüba kecha melii Niuland district nung mapa inyaksü atema ayongzük.

Niuland ya Assam den anasatapa lir aser ano Nagaland Expressway (Foothill Road) yangluba ajanga Niuland ya shisaliok aser shishilembadak tongti tesem ka akümstü, ta WSH-isa metetdaktsü.

Nagaland nung Covid vaccine agitsüpurtemi tekaratiba nung agitsüla

Dimapur, July 23, 2022 (TYO): Nagaland nung nisung lakh 1.75 temai Covid-19 vaccine indang dose tanabubua aser lakh 5.6 temai precaution dose magi lir ta Health & Family Welfare department-i metetdaktsüogo.

Nagaland nung tawa Covid-19 kanga puteter anungji vaccine

agitsüpurtemi tekaratiba nung sorkar Covid vaccination centres (CVCs) nung agitsü mepishir, ta department-i metetdaktsüogo.

Vaccine agiba, mask enokba, teka metsükba/merükba aser nisung o nisung tsüngda tepila ayuba ajanga Covid-19 menatepba nungi kümzükter, ta

parnokisa nenshia ashi.

Nagaland nung Covid vaccine indang dose lakh 16.90 tem agiogo. Iba nung vaccine agitsüpur 58.8% ajanga mezüngbuba dose, 46.8% ajanga tanabuba dose aser nisung 42,000 temai precaution dose agiogo.

CNTC-i sorkar dang schemes & funds meyipa reprangshitsü akhanger



Dimapur, July 23, 2022 (TYO): Sorkar indang schemes aser funds balala ya kin sasep nung masü saka district sasep nung alemtsüla saka tawa Nagaland nung schemes aser funds lemsaba ngua mepelar, ta Central Nagaland Tribes Council (CNTC)-i metetdaktsüogo.

Tawa iba maparen ajanga sorkar central Nagaland nung temulung magütsüba aser bendanga amshiba kuli sayur, ta CNTC Media Cell-i ashi.




Nagaland chief Minister Neiphiu Rio-i funds aser projects meyipa reprangshir senotsü kasasa alemtsüla. Tesüiba küm 20 tashi sokari central Nagaland senzüka yuja dang aruogo anungji onok


nem tagütsütsü tim agütsütsüla, ta parnokisa metetdaktsü.

Külen, central Nagaland nungi MLA 25 ya nübertemi shimtetba nübotem lir anungji nenoki iba atema jembitsüla. Nenoki nübertem atema menokdaktetra, mapa makokba tenüng nung MLA menden toktsütsüla, ta CNTC-isa tayongzükba agütsü.





**Caring with Heart,
Serving with Passion**



Strongest oil & gas brand in India
7th* amongst the Oil & Gas companies in the world
A Globally Admired Company
* (Brand Finance 2022 the world's leading independent brand valuation and strategy consultancy)



No place too remote,
no weather too extreme,
no terrain too harsh for
keeping the energy
wheels of the nation
running.

**Thank you for trusting
us, today and always !**

PEHLE INDIAN PHIR OIL

Mokokchung BJP-i Mahavir Chakra Capt. Imliaküm Ao nem tetushi agütsü



Mahavir Chakra Capt. Imliaküm nem tetushi agütsüba sentong ka takok ngua agir külen shilem agirtem aser Mokokchung BJP tir Imolemba Jamir-i anir par külem party tenzükertem noksa nung angur. Mokokchung, 23rd July, 2022

Mokokchung, 23 July (TYO): Kargil Vijay Diwas benjong den külemi Mokokchung Bharatiya Janata Party (BJP)-i nokinketer Mahavir Chakra konang ngutetsang Captain Imliaküm Ao nem tetushi agütsüba sentong tajung ka meraketa katsüogo.

Mahavir Chakra Capt. Imliaküm Ao nem Mokokchung BJP-i tetushi agütsüba ya tongtibangsa tarutsü nung Naga nunger/Aor chanu pa ama tasü tait nokinketer jenti sotetdaksütsü nükla yur iba sentong ya ayongzükba lir, ta Mokokchung BJP tir, Imolemba Jamir-i metetdaksü. Pa taküm ajanga Naga nunger/Aor lanur jenti ajungmesotsü imlar, ta tirisa shisem.

Iba sentong nung Capt. Imliaküm-i jembidang, Mokokchung BJP-i Kargil Vijay Diwas benjongmung mapang ka, iba tetushi sentong kanga apiteta ayongzükba asoshi pelaba den iba anogo ya otsü tajung rongnung ka asütsü, ta metetdaksü.

'Tanü ni ajaki meteta nokinketer ka/tsükchir mangkoleper ka lir, Indian Army nung alir ajaki mengutetba/ngunüba Mahavir Chakra ni ngutetogo, saka item konang nüngsang ajak ya Yisu temeim ajanga lir', ta pai Tsüngrem tenüng sanga kuli asü. Paisa Kargil rara nung atalokba otsü temenunratsüka lemsatap, pa tasü tait otsü angashidang teloki

tenüngsang tamaitü teka maten. 'Tanü putu ya tangatetba putu, iyongji tesayuri süshia mesüra shisashiri süshia sayutsüngi kangabo masür, saka tetuyuba dang agütsür, tetezü pei-i koma angatet ibaji kanga tongtibang lir. Anungji, ni tetuyuba kar dang agütsünür aser ibaji; nokinketer ka akümtsü asoshi tamasa Tsüngrem akümtsübutsula aser pei sasa taküm azüoktsüla', ta ashi.

Paisa sen agi alitsü makokba kar lemsatapdang; 'yimya/awashi, mulungdangtsü, akhümtsübu, libaliru tajung, nüchiba shisatsü, tamang katetba, taremsük, ochishiba aser temeim' ya lir aser itemji ngutetsü asoshi peisasa pei azüoktsüla aser meranga bushitsüla, ta Laishiba tekong kar bener arua ayongzük.

Asen Aor sasep nung mangdang ayutsü mapang tongja tongogo, pei taküm, pei kibong, pei lokti aser yimden asoshi mangdang ayutsü tim. Mangdang lateta yur ibaji ataloktsü asoshi nükjidongtem renemtsü tim aser aji ataloktsü asoshi kati ka yariteptsü lenmang bushitsüla, ta pai ashi. 'Kati ka yaritepba ajanga dang lokti aser yimden mangdang ataloktsü', ta paisa shisem.

Iba ama sentong ajanga lanurtem ajungshitsü imlar aser iba ya mapa tajung ka lir, ta iba osangbeneri asüngdangba ka langzüdang ashi. "Ni metetba aser ajangshibatam ajanga Aor/

Naga nunger lanurtem ajungshitsü merangtsü", ta paisa shisem.

MVC Capt. Imliaküm ya Chuchuyimpang nunger Wb. Arennungba Jamir aser Wt. Aoinla na jabaso lir. Par ya adianu 6 lir aser item rongnung tetsür 1 aser tebur 5 aser pa ya kibong nung tambusang. Pa ya Pakistan nunger tsükchirtemi tanü tashi tsübuba 2 Naga Regiment nungi lir. Pai konang tulu aketba Mahavir Chakra naroküm ya 1999 küm Kargil rara nung tsükchir mangko agia takok ngutetba ajanga senpettsü. Iba Kargil War koktetba tamaitü teti asoshi tenemtsüng tenüng "Imli Point" ta sür lung ka azünga tokja kar, ta ashir.

Sentong nung BJP Mokokchung Mahila Morcha tir Meyisenla Mollier, BJP state council member Imnakika, BJP Mokokchung Mandal Convener Imtichizung, BJP Mokokchung Minority Morcha tir Rongsenyanger Aier, Chuchuyimpang Village Council Chairman Temsumoa, Ungma nungi yimsüsür Raren Longkumer parnoki shilem balala agia liasü. Ungma nungi Guru Sangyusangi anir par medemtemi Mahavir Chakra Capt. Imliaküm nem sobaliba kensü nung konang tetushi ken tapet ka tenloksü. Iba sentong ASLB tezülur, Temjen Tzüdür den temoatsü meshia sarasademer tenzük.

C-Edge College Freshers' Day mungogo

Dimapur, Chiteni/July 23 (TYO): C-Edge College nung July 22 nü G.K. Auditorium nung 10buba Freshers' Day ayongzüka mungogo.

Iba sentong nung tongti o jembirji Minister (Housing), Government of Nagaland Tongpang Ozukum liasü.

Iba sentong ya renemer aliba ama B.A III Semester nungi Loziini Arche lenisüba nung agi aser BBA III Semester nungi Nyimang-i Tsüngrem temaotsü meshizüka sarasadamba sülen C-Edge College tir Er. Moa Aier-i lokti pela agizükba o jembia liasü. Paisa, tongti o jembir metetpelaba den kaketshir tasentem pelashishia agizük aser parnok nem kakets shisatsü tajungtiba agütsütsü nangzüka liasü.

Iba sülen Asst. Prof., C-Edge College Obed Patton-i achaayanga tenangzüktepba agi. H&A, ARMS Incorporation kaketshirtemi Japanese oshi nung ken ka aten aser Mr. and

Ms. Fresher Top 14 ethnic round agia liasü.

Sentong nung tongti o jembir T o n g p a n g O z u k u m - i , kaketshirtem dang pei sobaliba metsünga reta benshitsü ajungshi, koba parnok maitsü lir, ta ashi, ajisüaka lanurtem pei sobaliba nungi atsüngina aoba ngua sasa bilemba lemsatap. Paisa, kaketshirtem dang taküm nung nükjidong tongtetsü atema pei tejangraba sülen anidaksü aser tekolok shisatsü ajak bendanga agüja inyaksü ajungshi. Küm shia kaketshir meyirejang aika graduate asür aser educated unemployed tem tali akümba ken o benoka jembiba mapang pai, nisung ka pei sasa educated ta ajatsü atema degree certificate ya teperi masü ta ashi. Nisung kaji yimya awashi tajung, sobaliba jangja aliba, pei inyakba mapa nung tetangshi asünundang educated nisung ka ta jatetsü, ta pai ashi.

Maneni pai kaketshirtem dang sorkar mapa dang mebushi tanga lenmang sadema lapoka alibatam bushiyonga aotsü ajungshi. Sentong nung Principal CEC, Dr. Chubatola Aier-i achaayanga college awards agütsü. Narokümtem rongnung Best Star & Star Attendance Awards, Laurel Merit Award-College Level, Laurel Merit Award-University Level, Balakrishnan Ramanathan Award for EVS Topper, aser Viwhesieno Award for Girls Topper densema lir. Mezüngbuba sentong ya senior kaketshirtemi "Believe in Him" ken atenba sülen BBA V Semester, Finance Secy., Students Forum CEC Mhonthung-i tepela o jembir tembanga liasü. Tanabuba sentong nung kaketshirtemi pei dak aketba sempet balala saya liasü. Mr. Pfothoko aser Ms. VaniaWotsaof BAI Semester na nem Mr.& Ms. Fresher 2022 naroküm agütsüogo.

Administrator & ERO KMC-i metetdaksür

Dimapur, Chiteni/July 23 (TYO): Administrator & ERO Kohima Municipal Council, T. Lanusenla Longkumer-i sangdong ka ajanga, Deputy Commissioner Kohima-i July 16 nü metetdaksüba ama Kohima Municipal Council atema Intensive Revision of Electoral Roll asoshi shima aliba Supervisors aser Enumerator ajak dang training agitsü atema telemtetba agiba metetdaksüogo. Training mapanglem yamai alitsü: 27-07-2022 nü 10:00 AM; Serial Nos. of Officer/Official

Supervisors: 1 nungi 4 Enumerators: 1 nungi 52; DC Conference Hall 27-07-2022 nü 1 PM;Serial Nos. of Officer/Official Supervisors: 5 nungi 8 Enumerators: 53 nungi 103; DC Conference Hall. Supervisor aser Enumerator ajak dang iba sentong nung tamakok maludaksüi arua shilem agitsü metetdaksüogo. Training nung shilem magitetertem latetja aliba temzüng ozüng kübok jenjang tapet agitsü ta kasa sangdong ajanga metetdaksü.

BJP-i Murmu takok benjung ayongzüka amung

Kohima, Chiteni/July 22 (TYO): India nung tang mezüngbuba tribal tetsür ka ama tir asütsü atema Droupadi Murmu shimba asoshi Nagaland nung BJP party-i benjung sentong ka ayongzüka mungogo. Parnoki NDA candidate nem vote agütsüba atema United Democratic Alliance MLA tem dang kanga pelaba lemsatapa liasü.

"Lai iba mapa agizükba sülen tribal tem India sorkari achaayangba sentong aser policy tem tejakdangi tribal tem anir arutsü imlar," ta Nagaland BJP tir aser Minister for Tribal Affairs, Temjen Imna Along-i ashi.

Iba ya linük nung tribal tem atema nemadangtsü mapang ka lir, kechiyong tribal tetsür ka 15buba India tir kümogo, ta pai ashiba den Murmu-i linük nung kin ajak tenüng nung nokdaksü, ta ashi.

Paisa, la shimba ya Azadi Ka Amrit Mahotsav amungba den kanga dang tapet ta ashi. "Asenoki iba anogo ya linük nung tribal tem atema 'red letter day' ka ama bilemteti kechiyong Nagaland ta tribal tem aliba state ka lir," ta pai ashi.

Ato Kilonser Narendra Modi aser BJP National tir J P Nadda nati tir mapa atema la shimba atema tenüngsang agütsüba den Along-i, "BJP sorkar nükjidong aser ajak anisemtsü aser yimsüsüba tajung benoka inyaksangshitsü atema jenjang tapet agiba ya Naga nungertem nem onoki metetdaksünür," ta ashi.

Modi-i aniba sorkari küm 8 yimsü asüba mapang teti shitak inyaka secular democratic values tem sayuogo, ta pai ashi.

Along-isa, party karyakartas tem dang meranga inyaksü, nükjidong tulu ayutsü aser BJP party indang nükjidongtem atema bendanga agüja inyaksü ayongzüka liasü.

Maneni BJP state tir-isa, NDPP tir Chingwang Konyak, Chief Minister Neiphiu Rio, NPF tir Dr Shurhozellie Liezietsu aser NPF Legislature Party Leader Kuzholuzo Nienu aser Independent MLA ana densema UDA partner tem dang BJP candidate Murmu

nem vote agütsüba atema kanga pelaba lemsatapa liasü.

Yimden yimsüsüba dak sendakba nung tebilemdangba balala süaka ozüng yanglurtem ajak longjemer Murmu atema vote agütsüogo aser iba ya linük aser state nung tribal tem telongjem takok lir, ta pai ashi.

Manipur aser Nagaland BJP National organizing secretary In-charge, Abhay Giri-i, BJP candidate dak tamang katetba atema NLA züngsemtem dang kanga pelaba lemsatapa liasü. Linük tetsü nem state-i parnok temeim sayuba ya laia meyipa agütsütsü imlar, ta pai ashi.

Sentong nungsa Minister for Soil & Water Conservation, Geology & Mining and NSMDC, V. Kashiho Sangtam-i, BJP legislator temi nüboyimba mapang Dimapur nung Murmu den ajurutepba aser UDA legislator temi BJP indang NDA candidate pusemstü telemtetba agiba indang bilemtetshia jembia.

Yimden yimsüsüba dak sendakba nung Sangtam-i, state nung party lenirtem aser züngsemtem dang menden lemsatapba ken o ya national lenirtem nem bendanga toktsütsü aser state jenjang nung party atsülangtsü atema rangloker inyaksü ayongzük, kechiyong Naga nungertemi BJP ya tang tashi Hindu nunger party ta bilemer, ta ashi.

BJP srokar ya nüburtem atema aser tamangba yimsü ka atema masü, ta pai ashiba den BJP minister aser legislator süaka parnoki tamangba yimsü kecha dak merangloki state nung aliba nüburtem atema inyaker, ta ashi.

Iba sentong ya BJP Kohima district general secretary Pelenguto Peseyie lenisüba nung agi aser BJP state secretary Therali Ezung-i Tsüngrem temaotsü meshia sarasadema liasü. Kasa mapang nung BJP State otongdar Ngampa Konyak-i lokti pelaagizükba o jembia.

State BJP Mahila Morcha vice president Tsachola Rothrong-i Murmi indang taküm otsü tatsü agi lemsatap aser State ST Morcha tir Wanphong Konyak-i tepela anküp o jembia liasü.

Welcome To

STATE HANDLOOM EXPO

My Handloom My Pride

15th TO 28th JULY 2022 10:00 am to 5:00 pm

At Urban Haat, Dimapur, Nagaland



Arunachal nung Assam nunger 19 samaba nungi 7 ngutetogo

Guwahati, July 23, 2022 (Agencies): Assam nunger construction workers 19 tashi Arunachal Pradesh nung samaba nungi parnok 7 kumzükogo.

Assam nung mapa inyakertem ya Border Roads Organisation (BRO) ajanga anir aru saka parnok taoba hopta China den arrtsüa aliba Kurung Kumey district nung sama.

Tanungba nisungtem kumzüksü atema mapa inyakdar ta Kurung Kumey Deputy Commissioner Nighee Bengia-i ashi.

"Anepdang 12.30 ako tashi nung arem nung aayanger 7 tashi kumzükogo. Parnok ya kanga dang tashimait liasü" ta Bengia-i ashi.

Parnok nem chiyungtsü aser mozütem agütsüogo. Parnok BRO indang teseq ka nung lir. Parnok temang tajungba akümba sülen asüngdangyatsü, ta paisa shisem.

"Hokolbar aonung Furak river anasa yimdaklirtemi nisung 4 angu aser kasa tesem nungsa yasüng nisung 3 angu" ta Bengia-isa metetdaksü.

"Parnok Damin subdivision nung anepaludar aser Koloriang nungi medical team ka parnok yaritsü atema apusogo" ta paisa ashi.

Kurung Kumey district kübok Huri nungi kilometer 20-25 tashi pilar arem tulu ka nung yimdaklirtemi parnok angu.

Parnok ya Assam kübok Bongaigaon, Kokrajhar aser

Dhubri district tem nungi lir aser Damin circle nung BRO-i gari lenmang yangluba nung inyaker.

Parnok Eid amongtsü atema kidangi meyokba sülen July 5 aonung parnok ya Huri nungi jena ao. Parnok Assam-i aotsü atema aremleni ao.

"Onoki tanungba nisungtem bushidar. Local police, Indian Air Force (IAF), State Disaster Response Force (SDRF) aser Indo-Tibetan Border Police (ITBP) den ano tangartemi search and rescue operations nung yaritepdar.

Iba tesem nung alir yimdaklirtem aser shikarirtemia onok den yariteper" ta Kurung Kumey deputy commissioner Nighee Bengia-isa metetdaksü.

Aizawl nung mezüngbuba 'Ex-Servicemen Rally' agi



Aizawl, July 23, 2022 (Agencies): Assam Rifles-i Aizawl nung tang mezüng atema Army aser Assam Rifles veterans indang joint Ex-Servicemen Rally ka ayongzükaga agiogo.

Iba sentong ya Assam Rifles Ground nung agi aser Director General of Assam Rifles- Lieutenant General PC Nair, AVSM, YSM aden.

COVID-19 wara sülen iba raally ya tulutiba liasü aser nisung 800 jungnüa aden. Parnokji Indian Army nungi retired servicemen 429,

Assam Rifles nungi ex-servicemen 56, Veer Naris 7, Widows 66 aser Mizoram nung mapa lezmüka aliba sepai 250 liasü.

Iba sentong ya Ex-servicemen, Veer Naris, widows aser Mizoram nungi Next-of-Kin atongtsü nükjidong nung ayongzük.

Rally nung Ex-Servicemen aser parnok kinungertem Medical, Eye aser Dental checkup liasü.

Lieutenant General PC Nair, AVSM, YSM, Director General Assam Rifles-i Veer

Naris nem tetushi agütsü aser Ex-Servicemen den ajurutepa sensaksem.

Indian Army aser Assam Rifles-i Veterans o Veer Naris-i tasütait mapa aser bendanga agütsüba kodanga mamatsü. Assam Rifles ya North East nung küm 187 tema inyaka arur.

Linük Assam Rifles indang Assam Rifles Ex-Servicemen Centres (ARESA) 31 lir aser item ya Ex-Servicemen ajangzüksü atema lir. ARESA ya Aizawl nung ana aser Lunglei nung ka lapoka lir.

Assam nung bus E-Ticketing Service tenzükogo

Guwahati, July 23, 2022 (Agencies): Assam State Transport Corporation (ASTC)-i online bus e-ticketing service tenzükogo.

"Kamrup (Metropolitan) aser Sonitpur district tem nung mezüng atema online bus e-ticketing service tenzükogo. Iba ya Assam Electronics Development Corporation Limited (AMTRON) den yaritepa tenzükog" ta ASTC Managing Director (MD) Rahul Chandra Das-i shi.

Nagaon ajanga Guwahati nungi Tezpur tashi pilot project atema software yanglu aser

tanga tesemtem atema yanglutsü ta pai shi.

ASTC indang bus atema passenger temi city aser inter-district services indang e-ticketing service agutsü aser software upgrade asüba sülen state ajungalen tenzüksü, ta Das-isa ashi.

Ticket ji www.astcbus.com nung angutsü aser passenger temi assistance desk mesüra astc2009@gmail.com nung grievance redressal cell ajanga osang agiteptsü akok.

Passenger tem yaritsü atema 24/7 toll-free helpline no - 1800-345-3986 lapoktsüogo.

Meghalaya BJP vice president'er farmhouse nung teküp ayok

Shillong, July 23, 2022 (Agencies): Meghalaya state BJP vice president Bernard Marak indang farmhouse ka nung teküp ayokdak ama amshi ta Meghalaya police-i tai tongloktsüogo.

Meghalaya police-i Hokolbar aonung West Garo Hills district kübok Rimpu Bagan nung Bernard Marak'er farmhouse mita aoba sülen iba osang ya metetdaksü.

Iba tesem nung ozüngi memelaba mapatem aser teküp ayokba maparen inyak, ta Meghalaya police-i ashi.

Bernard Marak'er farmhouse nung 'customers' indang takdang nung contraceptives aika ngutetogo. Taküm February ita tanur tetsür ka samaba dak sendakba ken o nung iba farmhouse mita ao.

"February 28 nü nisung kati par tanur tetsür ka hopta ka shi samaba sülen kinungertemi bushitetba osang onok dang ashi. Temulung meleme bilemer ka den tetsürla angu aser tena Tura nung women police ket nung agütsü" ta West Garo Hills SP VS Rathore-i ashi.

"Onoki bushisüngdang asüdag tanutsüla dak tashiyim agi shi nung medemba angazük. Tanutsüla dang asüngdangya asüdag la den medemer ka

Rimpu Bagan-i anir ao aser idangji tebursang jagi taktang ka hire asü aser la dak aiben tashiyim agi shi nung medemba ashi" ta West Garo Hills SP-isa metetdaksü.

Meghalaya police-i iba farmhouse mita aoba sülen tetsür 24 densema nisung 68 puogo.

Police-isa tanur pungu, tebur 4 aser tetsür ka shibanger yua aliba angu.

Iba farmhouse nungi police-i contraceptives (condoms) 500 packets shi ka ngutetogo.

Bernard Marak ya taoba mapang telungpur telok nung chairman liasü aser 2000 tetenzüklen nungi pa anema ken o 25 tema benoka lir.

"Bernard Marak ya Achik National Volunteer Council (ANVC) (B) indang chairman liasü saka iba telok loksaba sülena pai Tura market nung shishilembar dang nungi tashiyim agi sen meshi, sen magütsürtem amokmeren, prangpong shibelenba mapa inyak, teküp ayokba mapa, yi aser lottery tickets ayok, teer counters lapok, tangar ali atsünga agi, TNT license agütsütsü atema ozüng alema sen meshi" ta Meghalaya police-isa metetdaksü.



North-Eastern Hill University (NEHU)-i Australia nungi Breakthrough Technology firm CV Laser Pty Ltd den memorandum of understanding (MoU) ka nung sign asüba sülen agiba noksa angur. Iba ya medical laser technology aser healthcare nung start-ups aser innovation industries tenzüksü atema lir. CV Lasers, Australia CEO Dr. Mukesh Jain, CEO aser NEHU Vice-Chancellor Prof. P.S. Shukla na lia MoU nung sign sütep.



TIR YIMYIM YIMOBILEM (EDITORIAL)

DIMAPUR AMUNGNÜ, CHITENI (JULY) 24, 2022

Yisu indang chiyongtsü

Asenok ajurutep dang kanga aria bilema asüngdangba o kaji 'chiyonger mechiyong, chiyonger südi, kechi aon den chiyong?' ta asüngdangba ya asütsü. Aji oda, anogo shia asenoki kanga süoki ia bilembaji tanepa kechi den chiyongtsü aser taonunga kechi den chiyongtsü ta shisabolua bilemba ya ka lir. Item o jembibarenji jungjunga bilemdangra, asenok alima nung aliba ya chiyongtsü asoshi alir amai asenoki bilemer, jembir aser inyaker. Iba kasaji, Yisu alima nung mapang tatsüka alidanga, Pa nütsüngtemi chiyongtsü indang kanga bilem, anungji parnok ajak atema chiyongtsü bushia jajaba otsü ka asenoki Yohan tapu 4 nung angur. Atangji, taküm alitsü atema tebok asüngtsüla, anungji chiyongtsübaji kanga nungdak, iba jagi Yisu nütsüngtemi parnok asoshi dang masü saka parnok den külem adenshia aliba nübortem asoshia bilemtsüba Mathi 14 nung shia angur. Ajisüaka, Yisu asoshi chiyongtsüji amtsüka masü mesüra angoa masü, saka Pa alimai yoksang tebui ashiba angatsübaji aser Pai mulungba atalokdaksütsübajiang Pa chiyongtsü liasü ta kasa tapu nung shia angur. Iba nungji asenoki Yisu tebilemba o Par nütsüng tebilemba na tetsüngda tuluka angur. Aji oda, Tsüngremi kechi inyadaksüner ta metetnüa sarasademtsü melen taküm chiyongtsü nung tali temulung agütsüba ngua, kenübo Yisui Par nütsüngtem dang anüng ozütemi meinyaker aser chiyongtsü atema shisamebulur, kechiyong kotaker tebui parnok mesür, ajisüaka nenokbo ozü taküm dang nung jagi kanga agia sentiba, anungji chiyongtsü asoshi kanga tebilem, saka tamasa Tsüngrem yimli aser Pai mulungba bushiang, süra chiyongtsü dang masü saka nenok nungdak ajak tebui Tsüngremi agütsütsü ta Mathi 6 nung shia aliba asenoki angur. Kasaji, asenok kibong nunga tanurtem asoshi chiyongtsü bushia senzütsü menüngdaker saka tsürabur ashi angara, tanurtem nungdak ajakji odang angur. Yisui asenok nem iba amaji angatetdaksünür. Asenok taküm aliba ya chiyongtsü asoshi alir masü saka taküm alitsü atema chiyonger aser takümji Tsüngrem meyong lir, anungji Tsüngrem mulung. Ibaji kodang asenoki angatetdir, atangji, Yisui ashiba ama, asenoki chiyongtsü tama masü saka Tsüngrem yimli aser Pai mulungba tama bushimatsü. Ajisüaka, asenoki Tsüngremi mulungba angatetsü memerangi, asenoki taküm chiyongtsü bushidang asen tashi aser mapang ajak endoker saka tatem nungbo chiyongtsüjiang mim kümer asenok taküm dang masü saka tanüla dena samar. Tsüngrem yimli tetezü Tsüngremi mulungba nung aliba mapang aser takümji lir. Aji oda, tebui mulungba meinyaki tebok atema dang senzü nungbo, iba anogo nung to Yisui Samariatsürla to majurula, anungji Samariatsürla temenen lenmang nungi mekümsüktetla. Ajisüaka, Yisui kodang tebui mulungba inyak, Pai Samariatsürla dang masü saka la ajanga Samaria nung aika temenen tesama tia nungi tekümtet angu. Asen taküm nunga kodang Tsüngremi mulungba inyakdir, asen taküm ajanga sama aliba tanülatem aika kümsüktetsü. Aji oda, kodang asenoki Tsüngrem tsüngdang kechi shitak (righteousness) ta tama bushia inyakdir, idangji Tsüngremi asenok nem bendenloksüba temoatsü agi tangar taküm aser kibonga aika moatsütetsü. Iba kasa tangatetba nung tenyar Paul-ia Rom nungertem dang kotak yimli ya chiajemba ka masü saka tanüla temeshi nung shitak litetba, tesünep aser tepela lir ta ashiba Rom tapu 14 nung shia angur. Aji oda, taküm chiyongtsü ya Tsüngrem yimli asübo chiyongtsü tajung den chiyonga jemer pelatepa lila, mesüra taküm chiyongtsü agi taküm lidaksür asübo nisung ya mesüla. Iba jagiang, Yisui satan dang nisung ya taküm chiyongtsü amtsük agi masü saka Tsüngrem bang nungi adokba o aser tashi agi dang alir ta Pa shi nung lumiseter aliba mapanga langzüba asenoki Mathi 4 nung angur. Atangji, asenoki alima chiyongtsü, rongsen aser jenjang tama masü saka Tsüngremi mulungba tama inyakra, idangji dang asenok shitakba takar akümtsü ta Laishibaibo ashir.

OLEMSABANG

Asen Aor/ Naga nunger küm 150 jubilee mong amongdang
Tsüngrem nem tenüngsang agütsütsü onük kar

~ N.Toshi Ao

Aieben kü molung nung asüngdangbaji asen lima yagi Yisu Osangtajung masü, tanga yimsü ka ang tama aru asübo asen nübortem ya koma kümer lila? Tanabuba tasüngdangbaji British nungertem ya arur asen lima ya amokbanga yimsu asü, saka American Missionarytem ya marudaktsü ka asü nunga koma süla? Mesüra asen lima yagi Baptist Mission masü saka tanga khristan telok tama aru ka asübo koma süla?

Ni kü sasa aeiben item indang bilemdanga aodang Tsüngrem sentong tali tejangjaba angateta pa nem tenüngsang teti agütsür. Asen Naga nunger asoshi British yimsüsüba aser American Baptist Missionary külemi aruba ya tesüngmangtsü temoatsü sentong ka lir ta tanü asenoki tali jangjaa angateter.

Asenok ajaki metet oda asenok ya kin/shilu tajung ka masü. British nunger süang, Missionarytem süang mesüra oda bendanger shirnoki asen nübor tia indang zülu parnoki kanga bulua amshiba ojang kar item ya lir. Naga nungerji tekolak bushirtem, shiruru mesüker, mangsa, tetsübuttsü kin, mojing külemertem, etc. Yangi tatishitsü ka shidi. British sepoy tanishir ka tenüng agi Maj. John Butler shibai 1847 küm "A Sketch of Assam" zülu pai asen Naga nunger indang yamai zülua lir:

"Naga nungerji kecha memetetba kin ka, nisung kolak bushirtem, shiruru ama tetsübuttsü taküm, meimcher takümji senti ta züngshia maliba kin, temang tenya-tenku (tereprangtsü tamajung), aser sentsü tenakrem...."(Nokinketer Mungchen, tapak i-ii).

Ano asenok ajaki züngshir mesüra angashia aliba kakat ka, "The Naked Nagas" by Fürer Haimendorf (1939). Item kakat ya azüngdang aser noksatem angudang asenok Naga nunger ya kin/shilu tajung jangratemtsü temeimtsü aketba kin kabo masü ta kuli peria angur. Ano aika lir.

Ano asen tzürabur mapang asenok anasa aliba Assamese nungertem asen nübortem Assam lenten nung ajurudang Naga nungertemji shiruru tasü shi achiba kin, mangsa aser nisung kolak bushirtem, tesempatsü nübortem, parnok ki anasa marudaktsü ta jembiba otsü aika lir.... Tila tanur ajepdang parnoki yamaisa jembia mesüzük. " Naga nunger arudaki, Naga nunger nem agütsütsü, tejep tasa ashi" (Naga manu ahe asi, nakandipe, tar khan hath te tepu) ta jembiba otsü asenoki angashia lir. Asen Aortem ya 1950s tashi kangabo tenük mesaki aru ta shiteter. Asenoki metet oda asen Naga kin karbo 1960s tashi leptepe liasü.

Saka asenok asoshi tasüngdangbaji, kechiba ibala kin/nübor ka dangi Tsüngremi pa Osang tajung bener Godhula Babu aser Dr. E.W. Clark yok? Tsüngremer sentong tulo ka yur pai asenok Naga lima ya shimtet ta asenoki angatetsü nungdak. Arung asenok ajaki ya ken aroka shisadangdi!

Tatalokba otsü ka:

1870s nungi tenzüka Godhula aser Dr. Clark asen limai atur Osangtajung sayua tekolak bushirtem, mangsa kin to temolung meyipa arogo tenzüka aodang aser asen nübor dang azüngtsü aser zülutsü sayua school tenzüka aodang 1900 shi nung Assam Lenten nungi Muslim Mission Nokpu (akidang record nung Merinokpu ta amshia angutsü) atua Dr. Clarki inyakba jilu ajizüka Muslim school tenzüksü merang.

Parnoki yamai bilem, Godhula aser Clark nungeri item leptepe kin, mangsa aser süngyanglu külemer Naga tenemi tua yimsü tasen sayua aser school tenzüktetra kechiba asenokibo makoktsü? Anungji parnoki asen limai atua par mission tenzüksü merang.

Parnoki Nokpu yimtaki atua school tenzüka. School nung amshitsü kakat longpak ajak angati dang agüja schoolji tenzüka. Aji dang masü mozüa angati agütsü. Parnoki schoolji Urdu oshi nung sayua tenzüka, school tanur nem Koran (Muslim Laishiba) angati dang agütsü. Parnoki yamai ashi, nenok Missionarytemi agütsüba Bible aser iba Koran ya ka dang ta shia memetetba nübortem mesüka sayu. Iba ama sayuba jagi asen nüburtem aika kanga mangmangdaksü kechiyong iba mapangji asen nüburtemi koba shitak aser koba tai aji mejangjai liasü.

(Maneni asüng adok nung...)

**Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazüngerü angateta agitsü mepishir**

Ao lima asoshi Tsüngrem temoatsü meshia sarasadema senzü

Okila: Ao Naga limai Yisu Khrista osangtjung arur küm 150 ajungba mapang Aor atema Tsüngremer temoatsü meshia sarasadema jajatsü Tsüngremi aiben jembi nung Rev. Dr. Kari Longchar, Rev. Walu Walling, aser Nüngsang Imchen, onok asem Tsüngrem dang leniba meshia sarasademer July 19, 2022 anepdang 6:00 ako nung Dimapur nungi apuso; ibai shingaia nongloksüba mesüra kecha telok tentet ka masü, saka Tsüngremer temaba nungi aruba tenongloksüba ka ta angateta Ao lima asoshi temoatsü meshia sarasadema senzüogo, ta Rev. Walu Walling-i sangdong ka ajanga metetdaksü.

July 19 - 21, 2022 Sarasadema jajaba tesemtem itemi:

July 19, 2022 anepdang 9.00 ako nung Tzütapela Nagaland Gate nung Nagaland Police duty nung alir parnok ishika dang mezüngbuba 150 Benjong tepela salem ashiba den parnok dang iba Gate ajanga chiyungtsü tamajung kecha bener Naga limai maittsüsa nenoki kanga mita iba Gate nukangma no, ta shir parnok atema aser Ao kin atema Tsüngrem dang temoatsü meshia sarasademer apuso.

Chungtiayimsen nung anener, iba 150 Jubilee mung nung Tsüngrem temoatsü nung ajak pelatepa amungtsü temoatsü meshia sarasademer apuso.

Iba sülen Changkiyimlang Baptist Arogo nung sannüker den tenzüker kar dena tenla kidang Changki lima asoshi temoatsü meshia sarasademer Changki Baptist Arogo sannüker den tenla kidang Tsüngremi Changki nung moajang ta sarasadema liasü.

Changki arogo ana nung sarasademer joko nikongtsütsü ang apusotet. Yimyu nung onok sarasadem mapang tajung ka agir onok tanendaki oa anisüngzüka mejang.

July 20, 2022: Mokokchung



Rev. Kari Longchar nung Ao lima tesem balala nung sarasadema senzüdang tangokba noksa nung angur.

Town Baptist Arogo tenzükerem den onok sarasadema jajaba nukmen tongmelang agi lemsatepba den Rev. Dr. Kari Longchari Laishiba nungi Mokokchung Town Ao Baptist Arogoi wadang aika nung shilem agiba atema tenüngsang agütsüba den tayongzüka o kar shir sarasadema liasü.

Iba sülen Ao Senden Kilem nung Tongror Luden den ajurutepa onok sarasadema senzüba osang lemsatepba sülen Ao Naga kin dangi Yisu yimsü arur küm 150 Benjong matongdangsa, Ao kin nung mokokmein kechisa ali, talisa Changki atema anükapangtemi yimjung atema kechi inyaker, item ajakji nenok leniba mapang yimjung yanglua, Ao kin dang masü Naga nung aniangma no ta tajungshiba o lemsatepa liasü. Tongror Luden nungi yimsüsür par asemia parnok mapang Ao kin nung yimjung yanglua asen kin ajak pelatepa iba 150 Jubileeji amungtsü onoka sarasademdarko ta lemsateper onok ajak aputaker Tsüngrem dang Ao Senden aser Ao kin atema temoatsü meshiba sarasadem mapang tajung ka agi.

Nikongdang Ungma Baptist Arogo sannüker den ajurutepa Ao kin tarutsü tia indang, aser Ao Mungdang atema Tsüngrem dang temoatsü meshia sarasadema liasü.

Joko Sentep aonung astüning ozü asem jembiteper arogo ka tenla ki bushia ao, saka ano mapang matong liasüji, Kümlong Baptist Arogo nung dang Tsüngrem O jembiba angar tanendaki odi ta jembiteper idakji aden. Sannükeri onok atubaji ngua onok den ajurutep, aser taonung nenoki Tsüngrem O jembiang ta ashiji ibaji meimlaba maangka ta angateta idakji tekülem nung Tsüngrem O jembi.

Sannükeri tekülem tenzüka ken tener sarasadem mapang agirbo onok nem mapang agütsü. Onok ya kecha telok tentet ka masü, mesüra shingaia onok dang iba mapa inyaksü mashi; saka Ao Naga limai Yisu osangtjung arur taküm agi küm 150 ajonger, anungji Ao kin atema Tsüngremer temoatsü meshia sarasademtsü Tsüngremi onok den jembi nung iba atema sarasadema senzür ta tongmelang agi onok senzüba osang lemsatep. Rev. Dr. Kari Longchari tayongzüka o Naga lima Khrista asoshi ta atemzüka alibaji Jubilee sülen ataloka inyaksü Tsüngrem dang meshidi ta ashi.

Tsüngrem O Filipi 2.6 -1: Yisu Khrista Nübusen ken nungi, Khristai ajemaluba tatishitsüji tanü asenoki angateta maparen ajak nung tenzüksü tayongzüka o lemsateper

Aolima atema teloki Tsüngrem dang temoatsü meshia sarasadem. Ajungben sentong ka nung onok ajak Tsüngremi kanga moatsü.

July 21, 2022: Ao Senden Tir Wb. Chubawati Longchar, July 20 nü pa aenlen ang aliba agi par kidang pa den ajurutepa Aolima nung dang masü Nagalima ajak nung yimjung küm sangdonga Tsüngrem tenüng nung tatok agütepa, 150 Jubilee Benjong matongdangsa maparen ajak inyaksü ajongshiteper sarasadema agia liasü.

Iba sülen Ao Baptist Arogo Mungdang Mission Centre Impuri lua Centennial Hall nung ABAM küm 150 Jubileeji Tsüngremi moajang, Jubilee sülen Tsüngremi lenla ajak nung Ao kin nem maangka agüjang ta sarasadema liasü. Iba sülen ABAM Executive Secretary den sarasadem tajung ka agia liasü. Talisa pa den külem tenzükerem, aser Impur nung alirtem maparen aika nung mazüngi alinung Tsüngremi parnok taküm aser kibongtem ajak anema tokja lia 150 Jubilee sentongji Tsüngrem temoatsü nung mungdakjang ta sarasadema liasü.

Impur Baptist Arogo sannüker kidangi tur sarasadem nüngdaktem lemsateper sannüker kibong asoshi sarasademba sülen Impur tenla

kidang toklang tenzükerem den onok kanga dang temoatsü ngua sarasademer Langpangkong lenmangi apuso.

Tuli Lenten nungi maneni Molungkimong Baptist Arogo tenla kidang arogo tenzüker aser yimsüsüra kar densemer 150 Jubilee iba yimkong nung Tsüngremer temoatsü aser pa tadenba nung mungdakjang ta sarasadema liasü. Molungkimong arogoi süngo renema aliba jemer apuso.

Molungyimsen Baptist Arogo tenla kidang sannükeri anir tenzüker ishika den iba arogo 150 Benjong sentong nung Tsüngrem temoatsü nung mungdakjang ta sarasademer, arogoi süngo renema aliba jemer apusoa Luyungi alua, idakjia Tsüngremi 150 Jubilee-ji Ao kin takok manung mungdakjang ta sarasademer apuso. Tzüdikong nung khen anener Nagaland Pulp and Paper Mill, Tzüdikong nung aliba ya tanaben tasen kümshia lanur aika mapa inyaksüsa Tsüngremi lenmang lapokjang ta sarasademer apuso.

July 19, 2022, onok sarasadem Tzütapela nung tenzüka July 21, aonung 8.00 pm. Watirongbang Nagaland Gate nung duty nung alir parnok ishika dang iba Gate nenoki kümdang aser mita nukang, aser ibai ajanga oset tamajung kecha asen limai bener taitdaksü ta shir parnok atema sarasademer apusoba July 22, anepdang 12.30 am nung Dimapur onok ajak kecha timtem makai pelatepa Tsüngrem tenüng sanga pei ki atong.

Tsüngremi mulungba süra ano maneni Ao kin atema Tsüngrem dang temoatsü meshiba sarasadem tesem balala nung agitsü, kechiaser sarasadem tashi nungji Tsüngremi mapa inyaksü ta asenoki metet. Iba sarasadema senzüba osang azünger ajak Tsüngremi moajang.

Arogo lenirtemi India Tir tasenba, Murmu nem tenüngsang agütsü

New Delhi, Chiteni/July 23 (Agencies): India nung tang mezüng tribal tsür rongnungi Droupadi Murmu-i India Tir election nung takok anguba atema Arogo lenirtemi la nem tenüngsang agütsüogo.

Tang teinyakdak Tir, Ram Nath Kovind kümsük July 24 nü tembangtsü aser July 25 nü Murmu-i Tir tenangzüka agitsü.

Indian Catholic Bishops' Commission for Tribal Affairs Secretary, Nicholas Barla-i, "Iba ya India nung tribal nisungtem atema nüma atangtsü mapang ka lir; la tribal nisung ka asüba ajanga lai tribal nisungtem timtem reprangtsü ta nüburtemi imlar," ta metetdaksü.

"Tang ama tensa ka nung tamangba yimsü balala tsüngda

rara lir aser tribal den minorities nisungtem takoksa angur, anungji Tir Murmu-i tayongzüka ajangshitsü. Tribal nisungtem libaliro ajungkettsütsü atema ozüng shidak benoktsü aasoshi lai inyaksüla," ta Odisha nungi Khristan putir, Barla-i ashi.

Murmu ya tamalen Odisha sorkar kübok Irrigation & Power department nung junior assistant inyaka liasü. Tesülen la Rairangpur nung aliba Shri Aurobindo Integral Education Centre nung honorary assistant teacher inyak.

2000 küm la Odisha nung minister aküm aser Jharkhand nunga Angh inyakogo.

La kümsük anaben Rairangpur nungi MLA inyaka liasü. July 25 nü Murmu-i Tir tenangzüka agitsü.

ANOGO ABEN TSÜNGREM DEN

TEMATIBAJENOKDAK

"Shibai tematiba jenokdak alir pai ajak takoksang akümbok nung alitsü."

- T. Ken 91:1

Iba tenüngsang ken züluri shinüba ya shibai Tsüngrem den telungjem akaba kimong mesema lir, pa asoshi kechi tia arudir aruaka tejenokdak aser anisüngzükdak lir. Alima nung alidang timtem tekangshi aser tepela ajurua asen taküm lia aor. Iba mapang nung Tsüngrem asen den lia aser aseni Tsüngrem dang shitetsüsa tembar kümer lira tsükchir nungi pai kümzüksü ta tenangzüka angur. Aji dang masü saka tasütsü wara, aonung taoksatsüji, anüngdang yima aoba lijakjangji nai metsübuttsü (vs. 5). Kechiaser Tsüngremi asenok kümzüksü aser yaritsü ta aseni metet.

Iba Tsüngrem shiba asen tematiba jenokdak lir pa ochiba jong amai lir pai nangzüka kodanga tiyazü masür. Tsüngrem O nung nai Kibubaji ne jenokdak kümdaktsütsü aji dang masü saka temenen kecha agia na matongtsü ta shia angutsü. Tsüngrem tenangzüka tem yamai; pai kü dang meim nung ini pa kümzüksü. Pai kü dang shitet nung ni pa temalen mendaktsütsü, Pai kü dang sarasademtsü aser ni pa dang langzüts. Kibubar tenangzükbaji züngaka, mezüngmatsü. Arung asen taküm nung paji ajak dang tematiba jenokdak kümdaktsüdio.

SARASADEM:

Kibuba, Na kü den ta ni metet nung, ni kü tebilemstü kü taküm rangben Ne tematiba jenokdak yutsür. Amen.

OLONG PAITEP # 6239

	1				2	3				
4			5							6
						7				
	8									
	9			10				11		
						12				13
14										
						15				
			16							

- | | | | |
|------------------------------|-------|--------------------------|-------|
| TIPILEN | | LANGTSÜNGLEN | |
| 2. Sü jeplok | - (4) | 1. _____ i | - (4) |
| 4. O agi merenshi | - (5) | 3. Kasa masü | - (6) |
| 7. Ayongküm li | - (5) | 5. Nüchi masü | - (5) |
| 8. Chiyungtsü mapang süiadok | - (4) | 6. Tashi endok | - (5) |
| 9. Tsüngrem den jembiba | - (9) | 9. Langtem | - (5) |
| 12. Saklok | - (4) | 10. Anü malidang | - (6) |
| 14. Samaba mebushitet | - (5) | 11. _____ kibur | - (5) |
| 15. Mejanga onü | - (5) | 13. Tebur tembar tsüngda | - (4) |
| 16. Tzü shiruru ka | - (4) | jatepba | - (4) |

OLONG PAITEP # 6238 TELANGZÜBA

- | | | |
|---------------------------------|--|------------------------------------|
| TIPILEN : | | LANGTSÜNGLEN : |
| 1. Azüng, 3. Kimen, 6. Ajok, | | 1. Atongla, 2. Nangzük, 4. Mojing, |
| 7. Nüngo, 9. Anen, 11. Nütsüng, | | 5. Nok, 8. Osü, 9. Anüolen, |
| 12. Azük, 13. Golab, 14. Yagi, | | 10. Nembang, 11. Nüngja, 14. Yim. |
| 15. Moapu, 16. Anüng. | | |

KOMA SÜLA TELANGZÜBA

Q. Nagaland nung Municipal aser Town Council nunga linük temzüngi latettsüba ama tetsürtem nem 33% ya shiteta yutsü nunga koma süla ?

Ohoi! Asen Naga lima nung tetsürtem nem maongka agüjadok tajungba asütsü, tangar alima talangi oadokoko. Arungma kechi jempiogo inyakadokti.

- Mr. Kiko.



ALOKBA LAW PRACTICE TENZÜKER :
Alokba Law renemer mezüng anogo chamber tasen nung mener client tasen aru yongyaa alidang nisung ka aruyaa ngur phone ajepa arur jembia sayur.

Alokba : Hello, yes ni Alokbai jembirbako, koda? Oh tai tokang no, ni ita ka shi mazüngsüa, case aika bendena lir, mapang malia no, tejashi. (Phone ji yur nisungba dangto asüngdangter)
 Koda, na langka nüngdak aliana?

Nisungba : Sir, ni nü office telephone connection sütsüi arubaa no.
 Lilir : WhatsApp

TANÜBO NAI LANGZÜANG

Q. NITI Aayog indang 'India Innovation Index (2021)' nung State kobai mezüngbuba jenjang ajangzükttet?

[A] Tamil Nadu [B] Karnataka
 [C] Kerala [D] Telangana

===== (Taruba adok nung onoki langzüksü)

YASHI ADOK TELANGZÜBA : July 20

AO OSHI ANGAZÜKDAK:

TANÜ ANGAZÜKTSÜBA OJANG

Nanglong
 (n) tanang agi telong tilala kuma yangluba (sweets)
 * Tanurtemi **nanglong** kanga chinür.

Nangpera
 (n) tedong tatsü nung teronem tajung aketba süngo tu tilala adoker (basil)
 * Tebok nung tango tamajung odaktsütsü atema **nangpera** amshir.



Tanur asoba anogo nung salem osang den noksa angati adokdaksünura - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimym@gmail.com nung yokang mesüra Tir Yimym bureau tem nung agüjang.

NAI-A YA METETTER MA

- ALIMA NUNG TAKATIBA NISUNG KAR:**
- Elon Musk : \$230.4 billion
 - Bernard Arnault : \$149.1 billion
 - Jeff Bezos : \$139.2 billion
 - Gautam Adani : \$114.1 billion
 - Bill Gates : \$103.0 billion
 - Larry Ellison : \$97.3 billion
 - Warren Buffett : \$96.9 billion
 - Larry Page : \$96.7 billion
 - Sergey Brin : \$93.0 billion
 - Mukesh Ambani : \$87.0 billion
 - Steve Ballmer : \$85.2 billion
 - Michael Bloomberg : \$82 billion
 - Carlos Slim Helu & family : \$81.4 billion
 - Zhong Shanshan : \$71.0 billion
 - Françoise Bettencourt Meyers : \$68.9 billion



SUDOKU # 6277 **TELANGZÜBA # 6276**

4	7	9	1	2	8	9	4	6	2	1	7	8	3	5	
	9	8	4	5		2	8	7	5	3	6	1	4	9	
6			5			5	1	3	4	9	8	6	7	2	
9		8	2	1		6	3	5	7	8	9	4	2	1	
			6	2	4	3	7	2	4	1	5	3	9	8	6
7	2		4	9	8	6	8	9	1	6	2	4	7	5	3
	1	4	6	8		2	4	7	9	3	6	2	5	1	8
5	2			8			3	5	8	9	7	1	2	6	4
8	7		2	3	6	1	1	6	2	8	4	5	3	9	7

OJANG LUTEP # 5824

- TIDTAANG :
- NTJEI :
- URUAAJKA :
- IDONÜKJNG :
- NGNU :
- NGLOKRAER :
- ITTASÜA :
- YAKRINA :
- NGALIZÜ :
- TOETTINGTSÜ :

OJANG LUTEP TELANGZÜBA # 5823

PEIBO ABENSA ALI AMA TANGAR TASHIMAIT TUTETTA JEMBIBA JAKLA INDOKANG

TAN HOPTA ATEMA - KOMA SÜLA ?

Q. Center government nungi yokba senotsü amshia asenok alidak terenlok mapa inyakba kuli kakat ' Utilization Certificate' nung sannüker nem dena kuli südaktsü nunga koma süla ?



Kolkata, July 23, 2022: Kolkata nung Enforcement Directorate (ED)-i West Bengal Minister, Partha Chatterjee dang ghonda 26 asungdangyaba sülen anir aoba mapang tangokba noksa nung angur. Tesayur shimba maparen nung ochimashiba ken o nung pa nem tai tonglokja lir.

Tribal nisungtemi Tir, Droupadi Murmu dak teimla aika akar

New Delhi, July 23 (Agencies): Tawa India Tir election nung tribal tsür, Droupadi Murmu-i takok anguba sülen linük nung tribal nisungtem kanga pelar, aser la dak teimla tulu akar.

Odisha nung Rairangpur jila kübok Upabeda yimdaklir tribal arrshi küm 25, Chandramani Hansda-i, Adivasi tsür ajak nem shisaliok agütsütsü atema Tir, Murmu-i inyaksü ta onoki amanger, ta metetdaksü.

Murmu Angh inyakba state Jharkhand nung tribal temeden atema inyaker lenir, Salkhan Murmu-i, state nung tribal nisungtem mapang talangka takoksa ngua aruogo, saka Murmu Tir akümbe ajanga tribal nisungtem temeden angutsü imlar, ta ashi.

Tang mezüing India nung tribal tsürtem rongnung Droupadi Murmu Tir kümogo, aser la Tir akümbe ajanga tribal nisungtem alidak school tem jenjang ajungkettsütsü, arem dak sendakba ozüingtem tongmelangba akümtsü, tribal yimsütem sorkari agizütsü aser tribal nisungtem nem tashi agütsütsü imlar.

Jharkhand state nung tribal tsür, Hansda-i, "Tang 'Didi'-i (oya) temaba jenjang tongogo, anungji kü taküm nung temelensi alitsü imlar. Murmu-i yaritetsüsa süra Adivasi tsür ajak shisaliok angutsü atema lai inyaksüla," ta ashi.

Murmu-i Tir election nung takok anguba ajanga Odisha, Jharkhand, Chattisgarh, West Bengal aser Assam ama tribal nisung aika aliba state tem nung nürurtem kanga pelar.

Tribal nisung kari tashi aginer, kari akhi tribal yimsü 'Sarna' agizükdaksüner aser kari tribal yimsü amangertemji Hindu aser

Khristantem dang nungi bendangdaksüner.

Jharkhand nung tribal lenir, Salkhan Murmu-i, "Tangbo onoki chichiba temeden aginer, kechiyong mapang talangka nungi sendokba aser takoksa ngua aruba tribals nungi kati linük nung temaba jenjang tongtetogo," ta ashi.

Salkhan Murmu-isa, Droupadi Murmu state Angh inyakba mapang nung taoba mapang Raghobar Das-i aniba BJP sorkari Chotanagpur Tenancy Act aser Santhal Paragana Tenancy Act yanglushitsü aliba nokdangteta liasü; item Act agizük asübo commercial atema tribal li amshitsü asoshi temelaba agütsür lila, ta ashi.

Kendriya Sarna Samiti, Jharkhand nung Tir, Bablu Munda-i, Murmu-i Tir tenangzükba agiba sülen pai la ajurua Sarna tamangba yimsü atema jembiner, ta ashi.

Kendriya-i, "Yimtsüingtem nungi tribal nisungtem atema Rashtrapati Bhawan kishi lapoktsütsü ta ni amanger. Onoki la ajurutsü aser Sarna Code takhangba agütsütsü," ta ashi.

Küm ka tejaklen Centre sorkar dang Sarna yimsü agizütsü atema mepishitsü asoshi Jharkhand assembly nung bangzüing ka agizüka liasü.

BJP MP aser tribal lenir, Salkhan Murmu-i, "Onok Adivasi nung ya süng-long tsüingrem amangertem lir. Onok ya Hindu nungera masü mesüra Muslim masü, Sikhs masü mesüra Khristantem-a masü. Sorkari 'Sarna Code' magizükba ajanga tribal nisungtem tanga yimsü dangi meyipdaksütsü meranger," ta ashi.

Chhattisgarh Bachao

Andolan nungi lenir, Alok Shukla-i, "Lai (Murmu) Forest Conservation Rules, 2022 agientsü atema tuyutsü onoki imlar, kechiyong iba ozüing ya Forest Rights Act, 2006 alema lir. Ozüing tasentemji ajanga arem nung alirtem den mastüingdangtepi project balala inyaksü atema arem li amshitsü asoshi state tem nem temelaba agütsür," ta metetdaksü.

Narmada Nav Nirman Abhiyan Trust nung züingsem, Yogini Khanolkar-i, "Lai (Murmu) la nem agüja aliba tashi amshia tribal nisungtem taginüba ataloktsütsü aser sobaliba wazüka ayutsü atema inyaksü onoki imlar," ta ashi.

Tribal temeden atema inyaker aser CGNet Swara tentetsang, Shubhranshu Choudhary-i, "La dang nungi imlaba aika lir. Ajisüaka küm pongu atema asenok Dalit (Ram Nath Kovind) nung ka Tir liasü, saka ibaji ajanga Dalit nung tajangzük ngur ma? Atangji mangu," ta ashi.

Choudhary-isa, Scheduled Areas nung Angh dak tashi tulu lir, ajisüaka Angh shingai tribal nisungtem atema kecha meinyak, ta ashi.

Murmu Tir shimba ajanga talisa Assam tea tribes ('Adivasis') kanga pelar. Linük nüchiso mangudang parnok aika süngo lu nung mapa inyaksü atema Bihar aser Jharkhand nungi Assam-i arua liasü.

Adivasi National Convention Committee nung secretary, Bir Singh Munda-i, "Linük temzüing kübok tongti ka ama lai, mapang talangka nungi Adivasi nungertem Scheduled Tribe jenjang akhangba ataloktsütsü ta tamang akar," ta metetdaksü.

OFFICE OF THE LIRMEN YIM ASEM (A.B.C) VILLAGE COUNCIL

DISTRICT : MOKOKCHUNG, NAGALAND.

TENÜNGSANG AGÜTSÜR

Lirmen yimtsüing nungi Wb.S.Daniel Walling kinungtsü **Wt.N.Asangla Longchar**, Nagaland government kübok School Education department nung Assistant Director mendeni atuba takok asoshi Lirmen Yim Asem (ABC) Council-i la nem tenüngsang tulu agütsür.

Ano maneni tarutsü nunga Tsüingremi la mapa nung takok aser anema aliba taküm tajung mojangma.

Sd/-

B.NEKEN LONGCHAR,
Chairman,
Akumen Village Council.

Sd/-

S.MAR LONGKUMER,
Chairman,
Tsüremmen Village Council.

Sd/-

B.KÜMZÜK LONGCHAR,
Chairman,
Lirmen Village Council.

BJP MP, Ravi Kishan-i Population Control bill benoktsü

New Delhi, Chiteni/July 23 (Agencies): BJP lenir, Ravi Kishan-i, linük nung nütsüing tali arenba aziöktsü atema pai Lok Sabha nung private member's bill ka benoktsü, ta metetdaksü.

Uttar Pradesh nung Gorakhpur constituency nungi MP, Kishan aser pa kinungtsü Priti na jabaso ka aser jala asem sosema lir.

Osangbenertem den jembidang Kishan-i, "Population Control Bill benok nung ang asenok (India) alima nung lenir akümtsü. Nütsüing arenba aziöktsüji kanga tongtibang," ta metetdaksü.

"Tang nütsüing arenba apibo asenoki timtem tulu ajurutsü. Ni Opposition dang iba bill benoktsü atema temelaba agüja kü o angadangtsü mepishir," ta paisa shisem.

Tawa UN report ka ajanga

ashiba agi, sangkümba (2023) India-i China ajateta alima nung nütsüing teimba aliba linükji India asütsü.

Mongolbarnü Rajya Sabha nung Minister of State for Health, Bharati Pravin Pawar-i, 2045 küm tashi nungbo sorkari nütsüing aziöktsü atema tebilemba lir, ta metetdakja liasü.

Bharati Pawar-isa, tanur abenba aziökba oset amshiba shilem 56.5 kümogo aser family planning atema nüngdak meperitsütetba shilem 9.4 dang kümogo, ta metetdaksü.

Laisa, Census Sample Registration System nung, 2019 küm nisung 1,000 shia nung Crude Birth Rate (CBR) shilem 19.7 dang kümogo, ta metetdaksü.

Tzüingluruwa mongpu Parliament July 18 nü tenzüik aser August 12 nü tembangtsü.

India nung ano nisung 21,411 dak Covid putet aser 67 asü

New Delhi, July 23 (Agencies): India nung ano nisung 21,411 dak coronavirus putet aser iba tashidak agi shiranger 67 asü, ta Honibarnep Union health ministry-i metetdaksü.

Tang tashi nung linük nung nisung 4,38,68,476 dak coronavirus putetogo aser iba tashidak agi asür ajak senteper 5,25,997 jungogo.

Tang India nung coronavirus agi teshirangdakpur 1,50,100 kümogo, aser ibaji coronavirus caseload nungi shilem 0.34 lir, ta Union health ministry-i metetdaksü.

Tesüiba ghonda 24 tsüingda coronavirus agi asür 67 ji Kerala

nungi 32, West Bengal nungi tenet, Maharashtra nungi trok, Gujarat nung asem aser Uttar Pradesh nunga asem, Assam, Bihar, Jharkhand aser Meghalaya shia nung nisung anana aser Chhattisgarh, Delhi, Goa, Madhya Pradesh, Mizoram, Puducherry, Sikkim aser Tamil Nadu shia nung nisung kaka asüba densema lir.

Tang anogo shia coronavirus positive putetba shilem 4.46 kümogo aser hopta shia positive putetba shilem 4.46 jungogo.

Health ministry-i ashiba agi, tang tashi nung linük nung coronavirus vaccine dose ajak senteper crore 201.68 agütsüogo.

Chhattisgarh CM-i yipru mopung atema tekümdangtsü metetdaksü

Raipur, July 23 (Agencies): Chhattisgarh Chief Minister, Bhupesh Baghel-i district collectors, Superintendents of Police aser urban bodies ajak dang state nung yipru tesashi den tzüinglu sashia arutsü, anungji kümküma alitsüla, ta metetdaksüogo.

Chief minister-i ketdangsertem dang tzüimetsüing lendong atema jelia mera agia inyaksü tuyu.

Tamalen Chief Minister-i


state ketdangsertem dang Bastar division kübok aliba district ajak nung tzüimetsüing agi kongshiba tesemtem nung kümzüka aser teyari agütsüba maparen inyaksü tuyua liasü.

Jharkhand aser kidanger state, Odisha nung yipru mopung kümteta lir, ta India Meteorological Department (IMD)-i metetdaksüogo.

Ibaji ajanga Surguja division dak alaka tanüingba tesemtem nungbo tzüinglu sashia arutsü.



New Delhi, July 23, 2022: Delhi sorkari Excise Policy tasen benokba anema Honibarne New Delhi nung BJP züingsemtemi longkak aitdang tangokba noksa nung angur.



UN Secretary-General Antonio Guterres, Russia Defence Minister Sergei Shoigu aser Turkey tir Recep Tayyip Erdogan nung Istanbul, Turkey nung tenangzüktepba ka yangluba mapang tangokba noksa nung angur. Ukraine aser Russia nati Hokolbarnü alima ajunga nung jangotsü agi anungba mesemtsü atema tenangzüktepba yagluogo.

White House-i Ukraine nem military package tasen agütsütsü

Washington, Chiteni/July 23 (Agenceis): White House-i sangdong ka ajanga, United States-i USD million 270 alang security assistance Ukraine dangi yoktsü ta metetdaksüogo.

Iba package nung medium-range rocket systems aser tactical drone tem talila densema alitsü.

Hokolbarnü iba osang sangdongba sülen US tir Joe Biden-i aniba administration-i Ukraine nem security assistance agütsüba USD billion 8.2 jungogo, koba Ukraine nem rongsenketzung aser security nung teyari agütsütsü atema Congress-i May ita agizükba USD billion 40 nungi agüja arudar.

Tang package tasenba nung ya High Mobility Artillery Rocket Systems, mesüra HIMARS pezü densema lir aser iba ajanga Kyiv nem Phoenix Ghost drones 580 alitsü atema temelaba agütsütsü.

Iba hadir ana ya Ukraine atema iba rara nung kanga tongtibang lir, kechiyong parnok dang nungi Russia nung indang artillery kanga agi tashi taitba süaka item hadirtem aliba ajanga parnoki rarateta arudar, ta White House National Security Council's coordinator for strategic communications, John Kirby-i ashi.

Tanga teyari agütsütsü sangdongba nung ano HIMARS atema artillery ammunition aser ammunition talila 36,000 rounds shi densema lir.

"Ukraine sorkar aser nübürtem kobika südir süaka

yaritsü ta tiri kanga jangja jangja metetdaksüogo," ta Kirby-i ashi.

Ukraine nung sepaitemi US nung yangluba rocket launcher aser tactical drone tem amshia Russia nung hadirtem aika raksatsüba den Russia nung sepaitem sotteta aliba mapang ka nung tang iba jenjang ya agiogo.

Russia-i injang timba khaloktsütettsü, saka parnok sepaitem aser hadirtem aika takoksa ajuruogo, kechiyong Ukraine nung sepaitem ket nung US aser anüolen aliba linüktemi agütsüba precision weaponry lir.

CIADirector William Burns-i Bodhbarnü ashiba agi, iba rara nung Russia nung sepaitem 15,000 shi süogo ta US-i asatetogo. Tang iba rara nung nisung asüba ya 1980s nung Soviet Union, Afghanistan nung raraba mapang akoksaba den kasashi asütsü, koba küm ter shi rara liasü.

Ukraine-i mapang talangka nungi HIMARS launcher talila meshia aruogo. HIMARS launcher tem yagi medium-range rocket tem khateter aser Russia nung sepaitemi parnok mamak tsüngda kara kara belenshiteter. Bodhbarnü Ukraine nung sepaitemi HIMARS ka amshia Russia-i amokbanger aliba Kherson tesem nung apu kanga tongtibang ka raksatsüba osang sangdongogo.

Tir Volodymyr Zelenskyy-i iba hopta ashiba agi, par linük sepaitemi Russia nem takoksa tulu bener arutsütettsü kechiyong Russia-i amokbanger

aliba tesemtem tanaben meyipa agütsü atema Kyiv-i sentong tapet yanglur anüolen aliba linüktemi agütsüba hadirtem amshitsü.

US ketdangsürtemisa, Ukraine nem GMLRS ta ser guided rockets talila agütsüdar. Pentagon-i longer-range rocket tem magütsür kechiyong Ukraine-i item rocket tem ya arrtsü adena orr Russia nung litsü amaktsü atema amshitsü akok ta bilemer.

US-i truck-mounted HIMARS 12 Ukraine dangi yokogo. United Kingdom-ia GMLRS rocket densema launchers tapu balaka asem agütsüogo.

Rara nung linük anapronglai drones kanga bulua amshidar. US-i taoba mapang Ukraine nem Phoenix Ghosts 121 agütsütsü nangzüka liasü. Pentagon ketdangsürtemi iba drone yagi kechi inyaktettsü iba indang osang tejangja magütsü, koba US Air Force-i develop asü aser Aevex Aerospace-i yanglur. Iba drone ya parnoki "full-spectrum airborne intelligence solutions" nung lenir ka ta züngshir. Iba drone nung camera keta lir aser target tem amaktsü atema amshitettsü.

US-i iba ita tetenzüklen, Russia-i Iran ket nungi drone noklang aika alizüktsü sentong yangludar ta bilemba lemsatapa liasü.

Russia nung ketdangsürtemi June mesüra July ita weapons-capable drone tem asadangtsü atema Iran anaben tashi semdangba indang satellite noksatem White House-i lemsatepogo.

USD bn 10 alang jangotsü export asütsü lir: Ukraine

Kyiv, Chiteni/July 23 (Agencies): Moscow aser Kyiv nati Hokolbarnü Turkey aser United Nations na den temesüktep tenangzüktepba kaka yangluogo. Iba ajanga alima ajunga nung jangotsü agi anungba paitoktsü aser Ukraine nungi adokba jangotsü tone million aika Black Sea port tem ajanga kecha tetsükdaktsü makia belenshitsü asoshi lenmang lapoktsütsü, koba Russia-i Ukraine amakba ajanga kanga mejungi raksar lir.

Ajisüaka iba tenangzüktepba yanglur ghonda 24 majung tsüngda Russia nung missile temi southern Ukraine kübok Odessa nung infrastructure raksatsüogo, ta Ukraine military-i ashi.

Odessa den Chornomorsk aser Pivdenyri rongnendak ya iba tenangzüktepba nung kanga tongtibang shilem ka lir.

Ukraine tir Volodymyr Zelensky-i Hokolbarnü ashiba agi, taoba küm aruba tone million 20 densema jangotsü USD billion 10 shi alang export asütsü lir. "Onok ket nung USD billion 10 shi alang jangotsü lir," ta Zelensky-i ashi.

Alima nung wheat, corn aser vegetable-oil export asürtem rongnung tongiba linük shishilemba asüngsashitsü atema iba tenangzüktepba ya ita asem atema yangluogo.

United Nations Secretary General António Guterres-i ashiba agi, iba tenangzüktepba yangluba ajanga chiyongtsü aika belener aotsü atema lenmang lapoktsütsü.

Guterres-isa, iba inyakyim asadanga atatsü atema joint coordination center ka amenokba indang metetdaksüogo. Turkey tir Recep Tayyip Erdogan-i ashiba agi, anogo ishika tsüngda inyaksangshi tenzüktsü.

Ajisüaka iba tenangzüktepba benoka inyaktsü atema temela masütsü. February ita nungi tang tashi nung Russia-i atsünger aliba linüktem Mozcow meyong akümtsü atema temelaba agütsüba ceasefire ka danga Zelensky-i magizüker.

Wall Street Journal den sensaksemba mapang Zelensky-i, Russia nung ajangzükba ceasefire nung shilem magütsü, ta shiogo.

Iran tzümetsüng lendong nung nisung 21 asü



Iran kübok Fars province nung ajungben tzümetsüng aruba sülen talidak ki tzu agi metsüngpanga aliba angur.

Tehran, Chiteni/July 23 (Agencies): Iran kübok Fars province nung ajungben tzümetsüng aruba sülen nisung 21 asü aser nisung asem samara bushidar, ta ketdangsürtemi metetdaksü.

Local Red Crescent Society ketdangsürtemi Honibarnü nisung asüba indang osang jangjashitsüogo aser ashiba agi, province yimtiba Shiraz nungi km 174 pilar aliba Estahban jila nung teküzmzüker 150 aser aerial unit dena yoka inyaksangshidar.

Estahban Angh Yousef Kargar-i ashiba agi, Hokolbarnü Estahban county teyongtsülen tzünglu kanga sashia aruba ajanga tzümetsüng adokdaksü, ta state news agency IRNA sangdong ka ajanga metetdaksü.

Local aser social media nung sayuba video tem nung garitem tzu agi aponger aoba aser tsürapurtemi garitem nungi pei chirnurtem kümzüktsü merangba sayuogo.

Province indang crisis management department tekolakba Khalil Abdollahi-i Reuters dang ashiba agi, tzüngmetsüng lendong nung

nisung 55 bo kümzükogo aser iba lendong nung gari 15 tashi metsüngbanga liasü.

Tzümetsüng ya Iran nung lemluwa mapang atalokogo; iba mapang nung kibongtem ayongküm, awatsüng kümbang aser valley amala temekong tesem bushia oa kazüteper.

Iran nung küm aika tsüngsarusa ajangshia arudar ajisüaka ano mapang shia tzümetsüng arur, koba ali kanga konger aliba mapang tzünglu aruba ajanga ali telungi tzu melui tzümetsü adokdaksü.

Scientists temi ashiba agi, alima tzu mopung melenshiba ajanga tsüngsang mepong kanga mejungi kümdaktsür, kong tsüngsarusa aser yipru mopung den tzünglu kanga tesashia aruba densema lir.

2019 küm tzünglu kanga sashia aruba ajanga Iran anüolen tip nung nisung 76 asü aser USD billion 2 shia alanga teraksatsüba bener aruja liasü.

January ita-a Fars nung tzünglu kanga sashia aruba sülen nisung ana asüba osang metetdaksü aser mapang tatsüka dang lir iba tesem aser tanga tesem kar nung nisung ti tashi asüba metetdakja liasü.



July 23, 2022 : Pak PM'er jabaso Hamza Sharif (teyong) Punjab CM asütsü tenangzüktepba agiba noksa nung angur. Hamza Shehbaz Honibarnü Punjab province CM asütsü atema tenangzüktepba agiogo.

KYS-i takok angur kaketshirtem tushio



HSLC/HSSLC aser NPSC tatidang nung takok angurtem den tongtibang nisung aser Kitsubozou Panchayat, Youth Society ketdangpur tem külemi tangokba noksa nung angur.

Kohima, Chiteni/July 23, 2022 (TYO): Honibarnü, Kitsubozou Youth Society (KYS)-i ward nungi High School Leaving Certificate (HSLC) & Higher Secondary School Leaving Certificate (HSSLC) Examinations 2022' nung takok angur kaketshir 82 densema NPSC exam nung takok tajung angur candidate ana nem tenüngsang agütsüba sentong ayongzük, ta sangdong ka ajanga metetdaksü.

Kaket shisatsü bushiba wadang nung takok angutsüba bendanga agütsür meranga inyakba atema Kitsubozou Panchayat chairman, Vimhalie Pienyü-i kaketshir nem tenüngsang agütsü.

HSLC/HSSLC nung takok angubaji tatem masü, saka khuret tuluba agizüka aser lokti nung shilem agia tajung inyaktsü asoshi tetenzük asütsü, ta Pienyü-i kaketshirtem ayongzük.

Pei inyaktsü jangraba kümdanga aser shisadanga shimtsüla aser medemer sentong tamajung nung manidaktsüla, ajasünungang tarutsü nung mesasatsü, ta pai ashi.

Nendaka aser meranga inyaktsü asoshi ajungshiba mapang, pei shimba lenmangji kanga tongtibang aser lenla ajunga nung pei taküm azüoka aser tali ajemalutsüla, ta Peinyü-i ashi.

Lokti nung teti tantstü-tambu aser lennirtem akhümtsübuttsü asoshi pai telok ajungshia liasü.

Ano külen, HSLC/HSSLC nung tamakok angur kaketshirtem dang temulung raksaa tezü matangtsüla, saka taruba tatidang nung takok angutsüba tali meranga inyaktsüla, ta Pienyü-isa ayongzük.

Public Health Engineering Department SDO, Sedevilie

Suohu-i, kaketshir ka ama taküm nung nükjidong tejangja alitsüla aser ibaji tongtettsü/ajangzükttetsü atema pei nükjidong nung rangloker meranga inyaktsüla, ta ashi.

Medemer aser tsürabur temi kangshia ajungshiba nung masü, saka meratai tim lenmang shimtsüla, ta Suohu-i ashi.

Suohu-isa, pei lesson bushitsü, medemer den kazütsü aser tanga inyakym atema mapang shitak agütsütsü asoshi kaketshirtem ajungshio.

Maneni, iba sentong nung Social activist Chekrongoi Theyo-i, tangba putu ya technology tasen agi sünga lir aser kanga dak toktepba putu ka kümogo, ta ashi.

Takok tajung angur kaketshir mesüra candidate tem ya tatidang atema jelia renemer tem lir aser kidang süshia mesüra lokti nung parnoki shilem tajung agir, ta Theyo-i ashi.

Iba sentong nung KYS General Secretary, Khrielezo Keretsü menden liasü aser sentong tenzük Baptist Mission Church, Associate Pastor, Menuolhoulie Sekhose-i sarasadem. Vethizölü Vero-i ken ka tena telok saksalemdaksü aser KYS Finance Secretary, Peter Chase-i tepela anküp o jembiba, ta kasa sangdong ashi.

AR-i Mkg nung training ka ayongzük



Mokokchung, Chiteni/July 23, 2022 (TYO): HQ IGAR (North) kübok Assam Rifles - Mokokchung Battalion-i Brehostibarnü (21.07.2022) Battalion Headquarters Mokokchung District, Nagaland nung Naga nung lanurtem atema pre-recruitment training ayongzüka liasü, ta sangdong ka ajanga metetdaksü.

Mokokchung Battalion-i online registration desk den külemi documentation check facility achaayangtsü, kong

security forces nung adentsü jangrar lanur aikati tenüng agüja liasü. Iba anogo Indian Army Agnipath Scheme atema candidate 100 aser Assam Rifles Technical & Tradesman Rally atema candidate 240 agi tenüng agütsüogo.

Physical aser written test atema tajungba renemshidaksütsü nükjidong nung Mokokchung Battalion-isa July 25, 2022 anogo nungi teshimtet lanurtem nem training agütsü tenzüktsü.

Kohima nung NPP lanur telongjem tentet



Kohima district nung NPYF tongti ketdangpurtem noksa nung angur.

Kohima, July 23 (TYO) : Soleho, tadong tir Kohima nung National Dr.Ketouelhou Vizo, People's Party Youth Front S p o k e s p e r s o n (NPFY) tentetogo aser iba Er.Keduopfezo, tongti zülur telongjem nung tir Kelengoto Wb.Sedevilie aser

Er.Kaqheto nungertemi anir züngsem parnok 12 shimogo ta tanü Nagaland state nung NPYF nung tezülur Wb.Moa Imcheni metetdaksüogo.

NPP telok nung ya Meghalaya Chief minister, Conard Sangma tongti lenir aser pa ama lanurtemi yimten nung temelenshi tajung bener arunertem nem maangka agütsüba telok ka lir ta NPYF lenirtemisa metetdaksü. NPP teloki Nagaland nung taruba election nung lanurtem nem maoangka agütsütsü nükjidong lir ta parnokisa metetdaksü.

GPS Mishikito nung Science Fest agiogo



GPS, Mishikito nung Science Fest sentong agiba mapang SDO (c) Dimapur, Yanthungbemo Kikon-i kaketshirtem den jembiba noksa nung angur.

Dimapur, Chiteni/July 23, 2022 (TYO): Honibarnü, Mishikito Student's Union aser Science fraternity Mishikito den Department of Science & Technology Government of Nagaland longjemer GPS Mishikito village nung Science Fest den exhibition sentong ayongzük. "Explore the possibilities" omen nung ajemdaker iba sentong agia liasü, ta sangdong ka ajanga metetdaksü.

Iba Science Fest cum exhibition lapokba sentong nung SDO Civil HQ Dimapur, Yanthungbemo Kikon (NCS) dena liasü.

Yimtsüng nung iba ama science dak sendakba sentong tulu takok ngua ayongzüktsü meranga inyakba atema, Kikon-i Mishikito Student's Union nem tenüngsang agütsü.

Iba sentong nung Chief mentor IHUB & SEC NSC Dept of Science & Technology aser associate organizer, Er. Ononguto Soleho-i Hub & Space education centre indang tongmelang agi telok dang metetdaksü.

Science Fest cum exhibition nung shilem agirtemi science

project balala 18 saya liasü. Angukakito (class 9) & Nisushokivi Tsuqhe (class 10) nati 'Uses of non convention resources' project sayu aser tenati mezüngbuba jenjang ajangzüktteta sempet angu. Kasa sentong nung 'Floating house' project atema Likali K Assumi (class 7)-i tanabuba jenjang aser 'Solar City' project atema Likivi M Yephtho (class 9)-i tasembuba jenjang ajangzükttet.

Iba exhibition sentong nung kaketshir 21 agi shilem agiogo.

Iba sentong achaayangertem den sensaksemba mapang Mishikito Student's Union, President, Puloto Shohe-i, sorkari iba amala sentong atema teyari agütsüra kaketshirtem ajangzüktsü asoshi küm shia iba sentong (Science Fest cum Exhibition) ayongzüktsü mulunga dang lir, ta lemsatpe.

Science fraternity Mishikito, Co-ordinator, Er Kikavi Awomi-i okila jembiba aser Asst professor (Drama in education), Uto V Chishi-i takok angur nem sempet agütsü. NIT Nagaland, PhD scholar, Lucy Sumi-i iba sentong ketdangsüa agi, ta kasa sangdong ajanga ashi.

Hukato H. Assumi-i Open Summer Angling kokogo

OPEN SUMMER ANGLING COMPETITION
 BY MUSU ANGLING CLUB
 IN COLLABORATION WITH DLMA
 23rd July 2022, 8:00 AM to 3:00 PM

Entry Fee ₹. 2000/- (Register Now!)

For Registration Contact: +91 70050 28334, Rinku: +91 7005312217, 7005659655

1st Prize ₹. 1,20,000/-	4th Prize ₹. 15,000/-
2nd Prize ₹. 60,000/-	5th - 10th Prize ₹. 5,000/- each
3rd Prize ₹. 30,000/-	11th - 20th Prize ₹. 2,000/- each

RULES:

1. One rod per angler
2. Fishes under 6 inches will not be counted.
3. Wild fishes will not be counted like (koiwari/kanduli/snailhead).
4. In case of any dispute, the decision of the organizers will be final & binding.

Winners will be based on biggest catch : Type of rig - free style : Number of hooks-3

Dimapur, Chiteni/July 23, 2022 (TYO): Honibarnü, Musu Angling Club den Dimapur nung Anglers den longjemer Musu, Hoito village nung Open Summer Angling tetoktepba ayongzüka liasü, ta sangdong ka ajanga metetdaksü.

tetoktepba nung Hukato H. Assumi-i ango tulutiba (seret 3.600) putet atema mezüngbuba jenjang ajangzükttet. Iba takok atema Hukato-i senpet lakh 1.20 angu.

Kasa tetoktepba nung Nito-i tanabuba (seret 1.800) jenjang angu aser pa nem senpet 60,000

agütsü. Manipur nungi Y.Amarjit-i tasembuba jenjang (seret 1.360) ajangzükttet aser pai senpet 30,000 angu. Iba tetoktepba nung shilem agir rongnung Joseph-i jenjang pezübuba ajangzükttetba atema pa nem senpet 15, 000 agüja liasü.

Item den külemi Open Summer Angling nung jenjang 5buba nungi 10buba ajangzüktteter shia nem senpet 5000 aser jenjang 11buba nungi 20buba ajangzüktteter shia nem senpet 2000 agütsüogo.

Open Summer Angling nung Manipur, Assam, Karbi Anglong, Wokha, Kohima aser Dimapur nungi Angler 240 agi shilem agiogo, ta kasa sangdong ajanga ashi.

Buba Mkg. District Badminton Open Championship 2022 tanu tembangogo



Indoor Badminton Stadium Mokochung nung 34 Buba Mokochung District Badminton Open Championship 2022 tanu tembanger kelen sentong shibangtsür District Planning Officer Mokochung Imlikokba Longkumer, achayangertem(MDBA) aser takok angurtem külemi tangokba noksa angur.

Mokokchung Chiteni/July 23 (TYO): Indoor Badminton Stadium Mokochung nung 34 Buba Mokochung District Badminton Open Championship 2022 tanu tembangogo. Tanu iba sentong shibangtsür District Planning Officer Mokochung Imlikokba Longkumer-i jembidang Mokochung nung aliba lanurtemi pei tazungba den külemi ano saisapong nunga

temelung agutsüba asoshi lanurtem dang tepalaba lemsatop. Lanurtemi iba tetoktepba nung takok angubaji masu saka shilem agibaji ajanga takum nung tangazükba aser tajangzük agutsüsürta Imlikokba-isa shisem. District Planning Officer Mokochung Imlikokba Longkumer-isa Mokochung lanurtem anitetsü asoshi timtem

jenti arema iba ama sentong tajung ayongzükba akaba asoshi sentong ayonger nem tenungsang aguja ashi. Iba sentong Tamsünla-i ketdang asü aser Clark Theological College nung Prof. Rev. K. Dhanbir Rai-i Tsüngrem temoatsü jazüka sarasadema tenzük aser iba sentong nung Convenor Tiakumzük-i tepela o jembia liasü.

Jonathan Trott-i head coach inyaktsü

Chiteni/July 23, 2022 (Agencies): Afghanistan cricket team indang Head Coach ama taoba mapang England cricket team nung batter Jonathan Trott shimogo aser taruba ita Afghanistan aser Ireland na asayaba mapang team nung pa adentsü terenemba lir, ta ECB-i ashi. Taküm March ita, Afghanistan Cricket Board (ACB)-i team nung head coach inyaktsü atema England nung Graham Thorpe shim, saka Graham kanga mejungi shirangba sülen

pa melen tanga ka shimtsü asoshi ACB-i nübu tanga ka bushia liasü. "International cricket nung Afghanistan ama iba saisapong meimba aser bendanga agütsür asayar team ka den külemi inyaktsü maongka anguba atema pelar aser khonang ama agizüker," ta Trott-i ashi. "Afghanistan nürtem tejak tentetsüsa telongjem aliba aser sempet tajung alir telok ka den külemi inyaktsü asoshi yongyasetar," ta Trott-i ashi. Arishi küm 41 tain Trott ya

South Africa nung aso aser 2015 küm Cricket asaya nungi manandang, pai Tests asayamung balala nung match 52 asayaogo. Cricket asaya nungi anener külen nungi Trott-i taoba küm T20 World Cup asayamung mapang England indang batting coach aser Scotland den consultant ama inyaka liasü. August 09, 2022 nungi Afghanistan-i Ireland den T20 asaya tenzüksü. Team ana tsüngda T20 series ya match pungo asayatsü renema lir.

Bangladesh ODIs squad nung Mushfiqur Rahim aniok

Chiteni/July 23, 2022 (Agencies): August nung Zimbabwe den ODIs match asem atema, Honibarnü Bangladesh-i züngsem 16 squad sangdongogo. Aruya aliba series atema squad nung wicketkeeper-batsman Mushfiqur Rahim anioka liasü. Hajj sentong nung shilem agitsü renemba ajanga Tawa Bangladesh aser West Indies tsüngda series atema Mushfiqur squad nung maniok aser Zimbabwe den match asem Twenty20 international series nunga Bangladesh squad (T20I) nung pa masayatsü. Team ana tsüngda ODIs masayadang, Twenty20 international series tama asayatsü. Fast bowler, Hasan Mahmud, shiba tesüiba ita 16 nung tesüsa international match asaya liasü, pa yirur aliba nungi taneptsü anguba sülen, Bangladesh T20 aser ODI squad anaprongla nung anisemogo. Bangladesh selector temi



Mushfiqur Rahim

aruya aliba series atema T20 squad nung asayar tasen kar bendenlokogo aser parnok rongnung opener Pervez Hossain dena lir. Bangladesh T20 captain Mahmudullah Riyad melen iba T20 series nung wicketkeeper Nurul Hasan-i anir team asayatsü. Tanga asayamung nung mazüngi shilem agiba ajanga anisüngzüksü asoshi Riyad dang mela liasü. Zimbabwe aser Bangladesh tsüngda T20 series ya July 30, July 31 aser August

2, 2022 anogotem nung asayatsü. Iba series temer anogo ana sülen August 5, 7 aser 10, 2022 anogotem ODIs asayatsü terenemba lir. T20s aser ODIs match ajak Harare Sports Club ground nung asayatsü. Bangladesh T20 squad: Nurul Hasan Sohan (capt), Munim Shahriar, Anamul Haque, Liton Das, Afif Hossain, Mahedi Hasan, Nasum Ahmed, Taskin Ahmed, Shoriful Islam, Mustafizur Rahman, Mosaddek Hossain, Najmul Hossain, Hasan Mahmud, Mehidy Hasan, Pervez Hossain. Bangladesh ODI squad: Tamim Iqbal (Capt), Liton Das, Anamul Haque, Mushfiqur Rahim, Mahmudullah Riyad, Afif Hossain, Nurul Hasan Sohan, Mehidy Hasan, Nasum Ahmed, Taskin Ahmed, Shoriful Islam, Mustafizur Rahman, Hasan Mahmud, Najmul Hossain, Mosaddek Hossain, Taijul Islam.

Hardik 'all-rounder' tajungtiba akümtsü: Akhtar

New Delhi, Chiteni/July 23, 2022 (Agencies): Taoba mapang Pakistan Cricket team nung fast bowler takotet Shoaib Akhtar-i, International sabang nung Hardik Pandya all-rounder ama tanaben asaya tenzükba pelashishia agizük aser pa shilem nung maneni rangloker asayatsü ajungshio. Alima nung cricket asayar all-rounder rongnung tajungtiba akümtsü asoshi Hardik dak sempet lir, ta Shoaib Akhtar-i bilemba ka lemsatop. India-i England madak takok angutsü asoshi Hardik Pandya-i batting aser bowling anaprongla nung team atema shilem tulu agiba sülen, pa nem 'player of the series' award agüja liasü. Manchester nung India aser England tsüngda ODI tasembuba aser final nung Pandya-i team atema bendanga agütsür asayaba nguogo. Jasprit Bumrah medeni India team final asaya liasü. "Tensa aziüka asayatsü asoshi team atema pa (Pandya) asayar tongti ka lir. Temang anepalutsü mechi küm ana team nung masaya aser tang pa tajungba lir. Pa sempet ajanga iba saisapong meimba sayur. Cricket wadang nung pelashishia shilem agiba den pai kanga temulung agüja asayar. Asayar takotet ka ama pai pa sasa aziükba ajanga pa dak sempet tajung aliba tali jangjar," ta Akhtar-i ashi. Pandya temang anepalutsüsa kümadokba ajanga team nungi pa agienba sülen, külem team nung pai

tanaben junga asaya tenzükogo, ta Akhtar-i bilemba lemsatop. India team takok leni anitsü asoshi pa dak tensa aziüka asayatsü sempet lir, ta Akhtar-i shisem. Taküm April nungi, captain ka ama Pandya akhüm nung Gujarat Titans-i Indian Premier League kokogo. Iba den külemi India team South Africa aser England den asayaba mapang pai junga asaya; aser captain ama India team anir Ireland den asayaogo. "Pandya ya fielder aser fast bowler tajung ka; aser fast bowler shilem nung pa asayar tongtibang ka lir. Bowler timbaka over tatemlen ball shidak yoktsü timtemba mapang, pai batter tem aziüktsü asoshi ball junga yoktetter," ta Akhtar-i ashi. "India nung cricket meimer jenti lir aser cricket meimba linük tulu ka nung asayar tongtibang ka akümba ya tenüng tajung den ang khuret tulu lir. Pai (Pandya) pa nem nüngloksüba khuret angateta aser iba wadang nung tali temulung agüja asayatsü imlar. Pai dang iba wadang nung temulung agütsüra, tenüng tajung den rongsen aser akhüm angutsü," ta Akhtar-i shisem. "Pandya ya atangji nunga batter tajung ka. Pai ball dak junga zükloksür aser ball yokba yimya asadanga pai asayar. Ajiasünung, pai dang maneni temulung agüja asayara, alima nung all-rounder asayar tajungtiba rongnung pa akümtsü ta amanger," ta Akhtar-isa ashi.

Bernarda Pera-i Hamburg Open kokogo



WTA Hamburg European Open tetsür kija final asaya nung Bernarda Pera-i Anett Kontaveit madak takok anguba sülen lai trophy amer tangokba noksa nung angur.

Chiteni/July 23, 2022 (Agencies): America tsür Bernarda Pera-i WTA Hamburg European Open kokogo. Iba tite angutsü asoshi Pera-i world no. 2 Estonia tsür Anett Kontaveit madak takok angu. Honibarnü, Hamburg European Open asayamung tetsür kija final asaya nung world no. 81 Pera-i 6-2, 6-4 agi top seed Anett tsükdaksü. Taoba hopta Budapest nung Hungarian Open takok ngur sülen Pera-i tite tanabuba angur asütsü. Taoba Deobar, Hungarian Open tetsür kija final nung Pera-i 6-3, 6-3 agi Serbia tsür Aleksandra Krunic tsükdaksü. Hamburg European Open title den külemi arishi küm 27 tain

Pera-i Budapest qualifying nungi tenzüka match 12 tashi atonga takok angur asütsü. Ano külen, taküm küm tetenzüklen February ita Anett Kontaveit-i Qatar Open final makokba sülen, lai Hamburg Open final nung tamakok nguogo. Qatar Open tetsür kija final nung Anett-i 2-6, 0-6 agi Iga Swiatek makok. Qatar Open nung shilem magidang Anett-i Saint Petersburg tite ngua liasü. Kasa asayamung (Hamburg European Open) tebur kija mezüng semi-final match nung Italy nung Lorenzo Musetti-i Argentina nung Francisco Cerundolo madak 6-3, 7-6 (7-3) agi takok nguogo.

BILEMDANGANG
"Tatok agütsütep nungang tsükchitep anentsü."